

## **Dithero tsa Tirelano mo Kutlwanong**

53/2014 Ka Sontaga 19 morago ga moletlo wa Modimo o o Borarobongwe, e le ka 26. 10. 2014

### **MO LEINENG LA MODIMO O E LENG RARA LE MORWA LE MOWA O O BOITSHEPO!**

Lefoko le le okamelang beke eno le re: **"Mphodise MORENA, foo ke tla fola! Mpholose, foo ke tla phologa! Gonne ke wena yo ke go bakang'**. Jer. 17:14

1. Sefela sa 13 - 13/14

**2. Thapelo:** Morena, o re itshepise mo boammaaruing! Lefoko la gago ke la boammaaruri. Amen

3 Lefoko la Testamente e kgologolo le kwadilwe mo go Lef. 16:15-22;.

Epistolo ka fa thulaganyong ya 2 e kwadilwe mo go Baefeso 4:22-32;

Efangele ka fa thulaganyong ya 1 e kwadilwe mo go Mareko 2:1-12.

4. A go ipolelwe tumelo ya bokeresete!

5. Sefela sa 12 - 12/13

6. Thapelo ya mmadi wa thero.

**7. Lefoko** ka fa thulaganyong ya 6 le kwadilwe mo go Ekesodu 34:4-10, le re: "Moše a betla matlapa a le mabedi a maboti a a tshwanang le a pele, a phakela mo mosong, a tihatlogela mo thabeng ya Sinai jaaka MORENA a mo laetse, a tshotse matlapa a mabedi a maboti ka diatla. Ke fa MORENA a fologa a le mo lerung, a ema fa go ene, a kua leina la MORENA. Jaanong MORENA a feta fa pele ga gagwe, a kua a re: 'MORENA! MORENA! Ke Modimo o o boutlwelo-botlhoko le boitshwarelo, o o sa feleng pelo, o o letlotlo la bopelotlhomogi le boikanyego; o o bolokelang ba le dikete bopelotlhomogi; o o itshwarelang molato le tlolo le boleo, mme o sa lese ope fela o sa mmetse, mme o beletsa bana le bana ba bana tshiamololo ya borraabo go ya losikeng lwa boraro le lwa bone.' Ke fa Moše a akofa a ikobela fa fatshe, a obamela a re: 'Fa ruri ke bonye bopelotlhomogi mo matlhong a gago, Morena, a Morena a ke a ye le rona - Gonne ke morafe wa dithamo tse di gagametseng - mme o re itshwarele molato wa rona le boleo jwa rona, o re tshole; re nne ba gago.' Ke fa MORENA a araba a re: 'Bona,

ke tla dira kgolagano ya gore: Fa pele ga morafe otlhe wa gago ke tla dira dilo tse di gakgamatsang tse di iseng di ke di dirwe mo lefatsheng lotlhe le mo ditšhabeng tsotlhe. Mme morafe otlhe o o leng mo gare go ona o tla bona tiro ya MORENA. Gonne di a boitshega tse ke tla di dirang ke na nao." Amen.

**8. Thero:** Barategi mo Moreneng, kgosi Dafita o tiisa tse di kwadilweng mo lefokong la thero ya kajeno. O kopanya dikakanyo tsa gagwe mo thapelong e e reng: "O ne a itsise Moše ditsela tsa gagwe le Baiseraele ditiro tsa gagwe. MORENA o kutlwelobotlhoko le boishwarelo; o bopelotelele, o bopelontle jo bogolo. Ga a nke a nna bogale ka metlha, le e seng go galefela ruri. Ga a re direla ka fa maleong a rona, le e seng go re busolosa ka fa ditshiamololong tsa rona. Gonne bopelotlhomogi jwa gagwe bo bogolo mo go ba ba mmoifang jaaka legodimo le okame lefatshe. O tlosetsa ditlolo tsa rona kgakala, jaaka botlhabatsatsi bo le kgakala le bophirimatsatsi. MORENA o utlwela ba ba mmoifang botlhoko, jaaka rrabana a utlwela bana ba gagwe botlhoko. Gonne ena o itse popego ya rona, o gopola, fa re le lorole," Pes. 103:7-14.

Tse di kwadilweng fano mo Testamenteng e kgologolo go akarediwa sentle mo bofelong jwa kgaolo ya 1 ya Kategisima e nnye ya ga Dr. Martin Luther. Tlhagiso ya Modimo ntsheng ya ditaolo tse some e re: "*Jaanong, Modimo o a reng ka ga ditaolo tsotlhe tse?* Karabo e re: O bua jaana, wa re: '**Nna Morena, Modimo wa gago, ke Modimo o o lefufa, o ke beletsang bana tshiamololo ya borraabo go ya losikeng lwa boraro le lwa bone, lwa bona ba ba ntshoang. Mme ba tshika di le dikete ba ba nthatang, le go tshegetsang ditaolo tsa me, ke ba direla ka bopelotlhomogi.**' (Ekes. 20:5-6) *Ke go reng?*" Karabo e re: "Modimo o bolelela petso pele mo go botlhe ba ba tlolang ditaolo tse. Ke ka moo re tshwanetseng go boifa bogale jwa ona gore re se ka ra dira sepe se se kgatthanong le ditaolo tse. Mme botlhe ba ba tshegetsang ditaolo tse, o ba solofetsa boitshwarelo le molemo otlhe. Ke ka moo re tshwanetseng go o rata, le go o ikanya gore re dire ka fa ditaolong tsa ona ka boitumelo."

Re ithuta ka mafoko ao gore bopelotlhomogi jwa Modimo ke jo bogolo go gaisa bogale jwa ona, bopelonomi jwa ona bo bogolo go feta tšhakgalo ya ona. Bopelonomi le lorato lwa ona ke tse di sikarang morafe wa ona. O re utlwela botlhoko ka bopelontle le bopelotlhomogi jwa ona. Ka tsona o sa ntse o re boloka le jaanong. Ke boammaaruri, ke se se gakgamatsang, mme go ntse jalo. Ee. O a re: "'Le fa dithaba di ka suta, le fa dithabana di ka reketla, bopelotlhomogi jwa me ga bo kitla bo tloga mo go wena; kgolagano ya me ya kagiso ga e

kitla e reketla' MORENA yo o go utlwelang botlhoko o buile jalo." Jes. 54:10 Modimo o pholosa Moše le morafe wa ga gabo ka bopelotlhomogi, le kajeno. Ke ka ntlha ya moo, fa re kaelwa go boifa Modimo, le go o rata, le go o ikanya bogolo go dilo tsotlhe. Go a batlega gore re se ka ra tshameka ka go iphaapanya le bopelotlhomogi jwa ona, mme re o tlotle, re se nyatse thato ya ona, mme re o leboge, re o tumise, re o direle, re o utlwe. Ke ka lorato lwa ona lo lo sa tlhologanngweng ke rona ka tlhologanyo ya rona, fa o romile Morwaaona yo o tsetsweng a le esi gore re nne bana ba ona mmogo le ene, re nne bana ba ona ka ntlha ya gagwe. Ka lona o re fa Mopholosi wa rona Jesu Keresete gore re rekololwe, re gololwe mo thateng ya yo o bosula, le mo thateng ya boleo, le mo thateng ya loso. Lorato lwa ona ke kabelo ya legodimo. Ke nnete, lorato lwa ona ke letlhogonolo le kgomotso ya rona, le tsholofelo e le esi fela e re nang nayo. Morekolodi yo e bileng e le Mogolodi wa rona o teng, o re utlwela botlhoko, o re itshwarela maleo a rona gore re se ka ra latlha, le e seng go latlhega ka bosakhutleng, re tshele ka bosakhutleng ka go tsosiwa mo losong. Epistolo ya kajeno e re tsoseletsa gore re ineela ka boikokobetso, re o ikokobeletse ka go ineela. Ke Modimo o o tletseng bopelonomi, o o bopelotlhomogi, o o sa feleng pelo, o o itshwarelang molato le tlolo le boleo, mme o beletsa bana le bana ba bana tshiamololo ya borraabo go ya losikeng lwa boraro le lwa bone.

Ba bašwa ba rona ba ithutang mo go rona? A ke tse di molemo, gongwe ke tse di bosula? Boleo bo tsala boleo. Ke bonye tseo mo tirong ya me ya go tsamaela ba ba bofilweng mo ponatshegong, le ba ba neng ba tsalelwa mo dikgolegelong. Ke tse di gagoganyang pelo, le go hutsafatsa maikutlo. Se tsietsegeng Modimo ga o sotlwe. Ga o tlogele ene fela yo o molato, gonne se se jwalwang ke motho, o tla se roba, go bonala ka matlaanya, ka matagwa, ka magodu, ka dikeletso tse di bosula, ka go tlioana, ka go galefelana, ka go nyatsana, ka go sebana, tsotlhe tseo ke tsa maleo a rona, tsa baleofi, a me, le a gago.

Lefoko la Modimo le a re kaela gore rotlhe re ipotsisise, re itlhotlhomise mo leseding la lefoko la ona fa pele ga sefatlhego sa ona. Motho wa mogolo ke wena, o tlhotlhomise ka fa ditaolong tse some tse o di dirileng mo tirong ya gago, le fa o le monna, mosadi, ngwana, morena, mohumagadi, motlhanka, lelata, o ne o sa ikokobeletsa, o sa ikanyega, wa tshwakgafala, wa galefa, o le yo o makgakga, gongwe morati wa dikgang, ka fa Kategisimeng o arabe potso e e reng Maleo a re tshwanetseng go ipobola ke afe? Ka karabo e e reng: "O tla a lemoga ka nosi, fa o ipotsisa ka fa ditaolong tse some; o tla bona ka tsona gore a o kile wa kgopisa motho ka mafoko gongwe ka ditiro, a o kile wa utswa gongwe wa tlhokomologa se e neng e le tshwanelo ya gago go se dira, gongwe a o sentse ka mokgwa o mongwe." Fa re

ipolela maleo a rona, Modimo o ikanyegile, o siame gore a re itshwarele maleo a rona ka ntlha ya ga Keresete. Lefoko la Morena le rialo. A re gopoleng mokgethisi mo tempeleng ka fa go kwadilweng ka teng gore "ene a emela kgakala, le matlho a se ka a rata go a tsholeletsa kwa legodimong, mme a itshwara seledu a re: 'Modimo, intsharele nna moleofi!'" Yo o nang le ditsebe go utlwa a a utlwe! Ka moo bakaulengwe, a re tlihabologeng, re kope boitshwearleo, re baakanye dikgang tsa rona. Nako e sa ntse e le teng gore re sale Mopholosi wa rona morago ka go ikanyega le ka boitumelo gore ba bašwa ba rona ba ithute mo go rona, ee, ba ithute, ba tsamaye mmogo le rona tsela ya Morena, e e leng tsela ya lesedi, ya tumelo, ya go pholosiwa, ya molao le Efangele.

Modimo ga o re tlogele, o a re batla, o a re bitsa, a re: "'Bona, ke tla dira kgolagano ya gore: Fa pele ga morafe otlhe wa gago ke tla dira dilo tse di gakgamatsang tse di iseng di ke di dirwe mo lefatsheng lotlhe le mo ditšhabeng tsotlhe. Mme morafe otlhe o o leng mo gare go ona o tla bona tiro ya MORENA. Gonne di a boitshega tse ke tla di dirang ke na nao.'" Moapostolo Paulo o kopanya tseo mo go Baroma 5:20-21 ka gore: "Mme molao o tsenye fa gare gore tlolo e ntsifale, mme kwa tlolo e atileng teng, ke kwa bopelotlhomogi bo atileng teng bogolobogolo, gore bopelotlhomogi bo tle bo buse ka tshiamo go isa kwa botshelong jo bo sa khutleng ka Jesu Keresete, Morena wa rona, jaaka boleo bo busitse ka loso." Re a leboga, Morena Keresete, O re utlwele botlhoko, Morena Keresete!. Amen

**9. Thapelo:** Morena Modimo Rara yo o rategang yo o mo legodimong, re lebogela lefoko le le boitshepo la gago, le le re tsosang, le go re tiisa, go re thusa, le go re gomotsa. Re lebogile ka pelo yotlhe, ka o re rometse Mopholosi Jesu Keresete go nna kgonone yo o re utlwehang botlhoko ka go re ithwarela maleo otlhe. Tlatsa dipelo tsa rona ka Mowa o o Boitshepo wa gago gore re utlwe, re amogele lefoko la gago ka boikokobetso le ka boitumelo. Morena, re bonye bopelotlhomogi mo matlhong a gago. Morena a a tsamaye mo gare ga rona gore dithamo tse di thata tsa rona di nolofadiwe, o tshwarele masula a rona, le maleo a rona, o re amogele mo bosweng jwa botshelo jo bo sa khutleng, re tle re tloge mo bofelong ka tshegofatso ya gagwe, re gorosiwe mo pusong e e sa khutleng ya gago, kwa re tla nnang mo thabong e e sa feleng ka ene Jesu Keresete yo e leng tshiamo ya rona. Amen.

Thapelo ya Morena: Rara wa rona yo o mo legodimong ...

10. Sefela sa 280 - 262/269

A kagiso ya Modimo e e fetang tthaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann, ka ngwaga wa 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.